



Dok sam hodao, čuo sam glas sa neba. Podigao sam pogled i vidio meleka, koji mi je prethodno došao u Hiri

Od Ebu Seleme ibn Abdurrahmana se prenosi da je Džabir ibn Abdullah, radijallahu anhumu, jednom prilikom govorio o periodu prekida Objave, pa je između ostalog rekao: "Dok sam hodao, čuo sam glas sa neba. Podigao sam pogled i vidio meleka, koji mi je prethodno došao u Hiri, kako sjedi na prijestolju između nebesa i Zemlje. Obuze me strah, pa sam se vratio i uzviknuo: 'Pokrijte me!' Tada je Allah objavio: 'O ti pokriveni! Ustani i opominji!' (El-Muddessir, 1-2), sve do riječi: 'I kumira se kloni.' (El-Muddessir, 5) Potom je Objava postala učestala."

[صحيح] [متفق عليه]

Govoreći o privremenom prekidu Objave na početku poslanstva, Allahov Poslanik nam veli: "Dok sam hodao uskim ulicama Mekke, čuo sam glas sa neba. Podigao sam pogled i ugledao Džibrila, meleka koji mi je došao u pećini Hira prije toga. Vidio sam ga kako sjedi na prijestolju između nebesa i Zemlje. Tada me je obuzeo strah i užas, pa sam se vratio supruzi i uzviknuo: 'Pokrijte me nečim.'" Tada je Uzvišeni objavio: "O ti, pokriveni", tj. onaj koji je umotan u svoju odjeću, "ustani" - na poziv i dostavljanje vjere - "i opominji", tj. upozoravaj one koji ne vjeruju u tvoju poslanicu. "I svoga Gospodara veličaj", tj. svoga Boga kojem se robuje uzvisuj i hvali! "I svoju odjeću očisti", tj. očisti odjeću i sačuvaj je od nečistoća. "A kumira se kloni", tj. ostavi i udalji se od obožavanja idola i kipova. Nakon toga, Objava je postala učestala i kontinuirana.

<https://sunnah.global/hadeeth/bs/show/66304>

